

# La yerba nas brañas de Lluña (Cuideiru)

ARGENTINA RUBIO FEITO

## L'iviernu

Las vacas dan muitu trabayu ya onde más hai que trabayar yía conos praos, porque d'e'llos sal la yerba p'alimentar al ganáu. Mientras van pasando los meses van fayéndose llabores pa que las vacas tengan bien de comer.

Pol iviernu aprovéchase'l tiempu pa llimpiar los praos ya pa ponelos llanos por culpa de las *patadas* de las vacas onde tuvieran paciendo. Nos praos que nun se riegan hai que *cuitar*, ou seya, llevar el *cuitu* de las cuadras al prau. Agora echan tamién *abonu químico*.

## El riegu

Los praos regaos pol ríu nun necesitan cuitu. Pa regalos hai que faere *banzaos* con piedras grandes nel ríu pa tornar l'augua ya mandala a la *presa*, que va dar a las *sangraderas* pa qu'éstas repartan bien l'augua por tol prau. Pa repartir bien l'augua polas sangraderas hai que *torgala* con *torriones* o piedras pa que salga curiosa ya con uniformidá.

La cuestión del riegu requier siempre atención, porque, por exemplu, si hai muitu aire las sangraderas puen *torgase* pola mor de las fueyas ya entós hai que llimpialas pa que l'augua nun saliera amontonada.

Cuandu'l prau yía namás d'un vecín, entós podía regar tol anu, pero si yía comunal con outros vecinos el banzáu tienen que lu faere ente tolas familias. L'augua repártese dempués en proporción a días más ou menos según lo grande que yía.

### **Segar ya esmarallar**

La yerba dexa de segase pa *verde* dende marzu ou abril, según se quier que seya'l sou tamañu. El mes de la yerba yía xunu, anque pue llegar hasta agostu pola mor del tiempu. Siégase la yerba cola *gadaña*, que los segadores *afilan* con una *piedra* que llevan nel *cachapu* ou *zapicu*.

La yerba segada queda en *marallos* ya entós hai que la *esmarallar*, esparciéndola pa dir secando. Al día siguiente dábase-y la vuelta pa que-y diera bien el sol a la parte d'abaxu. El mesmu día ou al outru faense unos montoninos pa que l'orbayu de la nueite o l'agua nun humedezan la yerba. Pa tou ello úsase *la pala dientes*, que yía un palu de madera con tres ou cuatro pinchos de fieru na punta.

Al outru día espardíase outra vuelta cola mesma pala la yerba pol prau pa darréu facer *las facinas*, ou seya, montones de yerba más grandes que los que se fixeran antes. Las facinas déxanse unos cuantos días reposando ya dizse que yía pa *sentar la yerba*. Por fin, un día de sol espárdese outra vuelta la yerba ya recuéyese en *gaviellas*, que se llevan al costazu atadas con una cuerda. Las muyeres llevaban las gaviellas na cabeza defendida por una *corra* pa que nun manquen. Avisábase a unu de cada familia vecina p'axuntar 10, 20 ó 30, según fuera'l prau. A esti grupu de xente llamábanlu *carretu*. Al llegar a la casa onde se recoyía la yerba invitábanlos a una *ronda* de pan ya vinu.

### **Nel payar**

Más tarde llevábase la yerba en *parigüelas* que se ponían a los burros o caballos. Las parigüelas yeran una ferramienta feita con fierros doblaos p'amoldalos a l'albarda ya la yerba poníase a los llaos ya por arriba. En llegando

metíase la yerba nel *payar*, casa pa meter la yerba seca na que s'espardía bien la yerba ya *calcábase* bien. A calcar la yerba diban los nenos, porque-yos prestaba abondo xugar cola yerba unos con outros. A esti montón únicu de yerba nel *payar* llamábase tamién *facina*. Pero volvíase al prau onde se segara pa poder *apañar* tola poca yerba que quedara col *garabatu*, que tenía dientes de madera asgaya.

A la hora de dala al ganáu había qu'*esmesar* la yerba. *Esmesar* tenía méritu porque había que saber sacar la yerba d'arriba p'abaxu pa que saliera con más aquel: el furacu que se formaba al sacar asina la yerba llámase *la taya*. Ya pa llevar la yerba del *payar* a la cuadra metíase nun *paxu*, que yía un cestu de *bringas* de madera texías (cuandu yeran grandes llamábanse *goxas*).

Tamién la yerba pue guardase fayendo un *paeiru* o *payeiru* que se fai clavando na tierra un palu gordu ya grande ya poniendo la yerba bien calcada alrededor tapándola al final con gamachos de castañal ya con *payá*.

### **Pol outuenu**

Pol outuenu los praos dan yerba outra vuelta ya entós hai que la segar pa verde o dexala pa pacer el ganáu. La yerba que se siega verde pal ganáu llámase *segadura*. Al ganáu suel dáse-y yerba seca ya tamién la *segadura*. Al pacer las vacas tien qu'haber dalguién *llindiando* pa que nun marcharan del prau, porque podían hasta saltar polas parés o polas *sebes*. Esti llabor faíanlu los nenos, cuandu nun taban na escuela.

### **El cambiü**

Col pasu del tiempu'l trabayu de la yerba cambióu por demás. Cuandu empezóu a haber caminos na braña entós usánonse los carros pa llevar la yerba a casa. De los carros tiraban las vacas ya tamién dempués bueis o caballos. Más tarde cola máquina *segadora* puen segase los praos rápidamente. Ya la *empacadora* aforróu muitu trabayu porque saca fardos de yerba ataos, fardos a los que llaman *pacas*.

Gracias a los *tractores* el trabayu de la yerba convirtiuse n'outra cousa.

Agora pue vese tamién la yerba recién segada en grandes bolsas de plásticu, que puen dexase ondequiera, nel prau o pa onde la casa.

Asina yera la cousa de la yerba en *Brañaseca*, parroquia de ***Samartín de Lluña***, nel conceyu de Cuideiru. Brañaseca yía una braña vaqueira ya agora nun hai práuticamente discriminación, pero en tiempos antiguos sí taban separtaos vaqueiros ya xaldos. Entavía m'alcuerdu d'unos versos onde dialogaban un vaqueiru ya un xaldu asina:

*Vaqueiru, chincheiru,  
de mala nación,  
comisti las papas  
dixisti que non.  
Comisti'l lleite caliente  
dixisti que sí.  
Mala negra morrina  
se meta en ti.*

*-Xaldu, rabudu,  
repegu de llana,  
¿quién te mandóu  
repicar la campana?*

*-Mandéilo you,  
que tengo las llaves  
del cura mayor.*